

東

華

錄

東華錄

雍正二十六

臣王先謙敬編

臣周瀚蕃恭校

雍正十三年乙卯春正月己卯諭內閣今日諸王大臣等以雍正十二年十月二十九日慶雲見於雲南之大理等府又見於廣東之高州府又山東甯陽縣產毓麒麟嘉瑞駢臻仰見上天慈恩福佑具摺稱賀朕向來不言祥瑞非爲謙讓之虛文歷年以來各省多有慶雲之瑞茲又值朕生辰雲南廣東兩省同見上天昭示嘉祥但兩省慶雲何如處處雨暘時若俾歲歲五穀豐登萬民樂利斯真可謂上天慈佑爾等爲朕思之何由使宗室天潢之中人人品行端方何由使八旗根本之地事事奉公守法何由使六卿喉舌之司紀綱整飭萬事咸宜何由使封疆守土之吏大法小廉萬

民安業朕之願望常多未滿則斯產麟何足深慶若以產麟爲朕德所感益屬朕所不居傳言誠能格天乃致產麟之瑞朕十二年來懇切至誠時時訓誡爾諸王大臣所頒諭旨不下數千萬言而諸王大臣尙未盡能激發天良公正無私實心辦理國家政事則是朕於人心未盡感格而謂能感格天心實不敢自信也朕惟益加黽勉爾諸王大臣亦當各思所以答朕諄諄期望之至意至於朝廷一絲一粟皆天下之民脂民膏如朕今者解衣以賜此衣雖被於朕躬實未嘗成之朕手揆厥由來仍是萬民脂膏豈朕所得而自有哉凡一絲一粟用得其當則是以民力所成者令教養民生之人食其美報朕與斯人兩居其是用不得其當則是以民力所成者供剝削民生之人恣其暴殄朕與斯人兩居其非如其是也朕亦何可言功如其非也朕豈得不引爲己咎爾諸臣自思之

必如何而後可使君臣之施受常居其是又何忍受君之恩而轉使君爲爾等受過乎夫大小臣工各有職業孜孜矻矻尙恐墮廢安得有寸晷餘閒優游逸樂如果無可辦之事有此一刻清閒此卽上天所賜之福當及時思其職業何事當爲思其過愆何事當改主敬二字實不可以須臾離者主敬則昏惰自去精明自生有事無事心常惺惺斷不肯別尋無益之消遣以致縱欲敗度爾諸王大臣亟須猛省奮勉厚自期待果能實心實力辦理國家政事俱成朝廷公正之大臣則澤被生民感召天貺將使四海九州之大盡致五風十雨之徵此時再感上天慈佑賀朕瑞祥豈不更勝於慶雲屢見麒麟疊生乎是乃朕所切望者諸臣尙各勉旃○召劉藩長來京調張渠爲江蘇布政使以薩哈諒爲廣東布政使

事中

○辛卯諭內閣傅泰由參領之職加恩擢用數年間至於巡

撫伊在任內並無一長可稱朕以其才具不宜封疆之寄旋命署理甯夏將軍事務其所職掌不過坐鎮地方約束兵弁整飭營伍數事並非伊力所不能料理者乃玩忽性成將國家公事視同膜外以至所管弁兵恣肆放縱目無法紀毆斃人命擾累地方溺職負恩莫此爲甚傳泰著革職拏問其甯夏將軍印務著副都統赫星署理其署副都統佟山身在地方見傳泰如此廢弛不行規勸又不奏聞深負委任著革職仍畱署副都統任效力贖罪○壬辰諭內閣朕每見天下督撫有司等於人命盜案查審定擬時曲爲開脫以行其婦寺之仁意謂寬宥一人可以種陰德於冥冥之中不知君與臣皆任教養斯民之責平時不能殫教養之道使之不陷於重辟在吾君臣已有不得辭之過然尙屬伊等干犯法紀自取其罪國家設立科條原以禁暴除姦使人共守非可枉法市恩

是故刑罰之設乃不得已而然至於水旱災荒天時有不齊之數  
鰥寡孤獨人生有所遇之窮彼甯填溝壑而不肯爲匪者率皆良  
民似此無辜之赤子不幸而遭值困阨朕以牧養斯民之任寄之  
天下督撫有司而不能保護撫綏登之衽席乃視同秦越聽其飢  
餓流離此孟子所謂受牧牛羊立而視其死者天高聽卑必加重  
譴而顧欲於命盜案中曲活一二有罪之人以冀幸福報何識見  
顛倒一至於此乎朕望天下督撫董率有司屏棄虛文敦尙實政  
平時則勸農教稼闢地墾荒崇儉黜奢儲糧積粟以立其根本偶  
有旱潦卽據實奏聞殫心區畫俾澤中鴻雁共慶樂郊有此濟人  
利物之功方不負父母斯民之職較之曲活一二罪人者相去奚  
啻霄壤耶至於樂善好施史稱義舉扶危濟困人有同心周禮以  
六行教萬民孝友睦婣而繼以任恤可見任恤之道與孝友並重

也鄰里鄉黨之間原有休戚相關之誼以己之有餘濟人之不足在我本爲不多之費而在人已爲當厄之施况民有秉彝自然觀感興起眾擎易舉利益孔多從來積善之家必有餘慶一人行善則慶在一家眾人行善則慶在眾姓果然風俗醇良號稱仁里則和氣致祥天道之感應捷於影響凡水旱災祲之戾氣悉變爲五風十雨之休徵矣然興仁樂善者乃鄉鄰長厚之風而鼓舞旌揚者則大吏有司之責如所屬內有紳衿士庶惠愛鄉閭力行善事該督撫等當優禮褒嘉加意培植以表揚之應題請者卽行題請將朕此旨刊刻頒布務使遠鄉僻壤人人知悉○解鄂昌任調楊鼐爲四川巡撫以吳應棻署湖北巡撫

由左僉都御史署

○實授程仁圻

陝西西安布政使○庚子以德福爲盛京禮部侍郎

由大理寺卿遷

二月壬寅朔諭內閣聞各省武弁中有於該管上司前文稟應對

用天恩天喜天顏聖明謝恩等類字樣者且於上司批示稱爲接奉硃批此等謬妄處皆由該弁不諳文義信口稱呼無人指教其文稟多憑幕客胥吏書寫該弁目不識丁以致草野無禮至於如此嗣後著該管上司隨時教導俾各知禮節傳諭直省督撫提鎮等知之○癸卯諭內閣定例文武生員不准入伍食糧聞陝甘兵丁內有文武生員見充營伍而延緩一鎮竟至六十餘名之多在文武生員名列膠庠各應專心舉業嫻習技藝以圖上進豈可又挂名營伍其已經入伍之兵粗知文藝願應考試者原有准入武場一體鄉試之例不必又附名學校若以一身而兼顧兩頭必且互相牽制轉致兩誤著通行陝甘各提鎮將各兵內之文武生員查明革糧令其歸學如有情願革去生員當兵食糧者卽行知該學政除名准畱營差操並飭行各營將弁嗣後文武生員一概不



許濫收入伍將此通行各省知之○增山東運河廳千總把總各一河捕廳洳河廳把總各一○乙巳以侵帑營私革辦理口外屯田事務左都御史孔毓璞職○己酉 上御經筵○庚戌調魏廷珍爲禮部尙書以高起爲兵部尙書王鈞爲工部右侍郎由光祿寺卿遷○兵部議准署陝西總督劉於義奏西大通鎮設兵三千六百名弁兵過多應加裁汰請裁大通鎮總兵一遊擊守備千總各二把總四兵一千二百名改設副將一都司一畱千總二把總四兵八百名鎮南之白塔營裁參將守備千總各一把總二兵四百名改設都司一畱千總一把總二兵四百名鎮西之永安營裁千總把總各一兵二百名畱遊擊一守備一千總一把總三兵六百名至河州地近極邊原設副將一都司一千總二把總四兵一千一百八名不足以資彈壓請改副將爲總兵官添設遊擊二分爲左右

營改都司爲守備增守備一把總四兵八百九十二名從之○壬

子以覺羅倫達禮爲廣東按察使

由郎中遷

○癸丑

上謁

陵啓鑾

○丙辰

上謁

昭西陵

孝陵

孝東陵

景陵回鑾

○己未

上還京師○庚申莊令翼休致調覺羅倫達禮爲福建按察使

白映棠爲廣東按察使以彭人瑛爲湖南按察使

由直隸清河道遷

○辛

酉諭內閣從來文武兩途國家並重未嘗軒輊於其閒習其業者

必專心致志不惑於兩歧然後有所成就可以備國家之用每見

無識之武臣沽名邀譽輒稱營伍中設立義學興文育材又或請

令駐防兵丁子弟就近應該省鄉試此皆舍本逐末糊塗顛倒之

見夫國家設立營伍原爲折衝捍禦之計營伍中提鎮大臣乃弁

兵之表率也意之所向眾共趨之今乃浮慕讀書向學之虛名而

於持戟荷戈之地以文章翰墨相矜尙是本業在武而注意於文

必致弁兵等相習成風人材漸至輟弱武備亦至廢弛豈整飭戎  
行之道乎彼弁兵之子弟其資性聰慧可以讀書者聽其延師自  
課循例考試以圖上進此乃兩全之道爲提鎮大員者何必以虛  
名倡率使之輕視本業且與其設義學以課文何如設義學以課  
武尤爲輕車熟路易於有成也至於各省駐防乃專爲武備而設  
其子弟通曉文義者原聽其來京應試以爲進身之路若准其在  
外就近鄉試則伊等各從其便競尙習文之名而漸忘用武之實  
將來更有何人可充駐防之選乎在京師則文武並用是以文武  
兼收在駐防則武備是資應以武途爲重卽如農工商賈各專其  
業然後可以收其效此古今不易之理柰何界在兩歧其流弊必  
至兩誤向後仍有妄行奏請者朕必加重處○壬戌以劉吳龍爲  
光祿寺卿劉柏爲安徽按察使

由江蘇蘇州  
常鎮道遷

○癸亥以吳應棻爲

兵部右侍郎仍署湖北巡撫

由左僉都御史遷

○甲子命工部尚書巴泰

協辦內閣大學士事○丁卯兵部議准四川總督黃廷桂奏更定

營制事宜一永定營遊擊請改爲都司裁守備一千總一把總二

兵二百名冕山營遊擊改爲都司裁守備一千總一把總二兵三

百名所有原管龍潭等地方歸靖遠營轄一柏香營都司千總把

總各一兵三百名悉裁所有原管夷民撥歸越巂營轄一越巂營

路當孔道舊設官兵不敷防範請將遊擊改爲參將添設千總一

把總二兵一百名移守備把總各一兵一百二十名分防柏香地

方從之

三月丙子諭軍機大臣等據遣往準噶爾使臣傅爾丹等奏稱噶爾

丹策零請將哲爾格西拉胡魯蘇地方爲我喀爾喀遊牧地界等

語朕思伊旣如此懇求若堅執不允恐使臣徒勞往返終無完結

之日但朕無由懸定此係喀爾喀等遊牧處額駙策凌素所深知著將傅爾丹等奏摺並地圖密寄額駙策凌令其細閱噶爾丹策零所請應否准行如不可行或於我原定地方之內伊原定地方之外另有何處可立邊界暨定界之後其中空閒地方應否禁止彼此打牲之處俱著詳細定議事關重大務期永遠有益著於噶爾丹策零使臣垂納木喀等未到之前具奏○己巳吏部等衙門議准湖廣總督邁柱奏苗疆建置事宜一彝陵州請改置一府裁知州州判學正吏目缺設知府通判教授訓導經歷司獄各一附郭一縣設知縣教諭典史各一俱駐府城分防同知一駐潯潭一容美土司請改一州設知州吏目各一駐州城州同一駐五百坪州判一駐北佳坪改慈利縣屬之大崖關歸新州管轄添設巡檢一駐紮其地其大崖關外原設土百戶一請裁一五峯司改置一縣

設知縣典史各一駐縣城改長陽縣屬之漁陽關歸新縣轄添設縣丞一駐紮其地所有新改州縣及歸州長陽興山巴東等州縣俱隸彝陵新設府轄一府屬地方請設遊擊一守備一千總二把總四外委千把總四兵七百名分防駐紮其各緊要隘口酌添塘汛三十九處武弁均於彝陵鎮右營內抽撥從之尋定彝陵新設府曰宜昌附郭縣曰東湖容美新設州曰鶴峯五峯新設縣曰長樂○癸未諭內閣據刑部議覆江西民人徐節孫因救母情急致死黃起鵬一案本內有徐節孫若不奪打聽其下手則其罪與殺母無異等語殊爲錯謬凡父母與人爭鬪而救護情急致傷人命者止當原其救父母之情若救護不力而卽加以殺父母之罪自古及今無此科條也此等過當之語卽見之談論尙且不可今乃載入奏章通行天下是迫人子以不得不殺人之勢又添殺人救

親之條例矣。况果如部議設有兇惡之徒謀欲殺人先令伊父母尋釁鬪毆故作跌蹶損傷之狀而伊子繼至迫切救護斃人性命且得引此案以自辯則貽害長姦豈可勝言乎。數年以來屢降諭旨凡救親情急致成命案者當察其情罪之輕重以定減等與否。假若一概從寬則其中詐僞日出弊端叢生刑罰多不得其平矣。徐節孫之罪實有可原但部議與殺母無異一語大有疵病不得不指出曉示內外之秉持法憲者。○丁亥 上親耕藉田。○戊子江南總督趙宏恩奏江甯省城舉行保甲事宜諭編立保甲先應查度地方之可行與否有司才力之能行與否毋一味嚴急勉強從事儻地方或不相宜才力或有不逮反滋紛擾毫無裨益前代論治術者動稱社倉保甲二事然必須俯順輿情徐徐訓導相機酌宜而行之方能奏效非賭博宰牛私鑄盜匪等項但當繩之以

法者之可比也且立法之初嚴以勝寬而不知過嚴之弊害亦隨之蓋寬徐則奸宄暫時潛蹤而善良卻不至株連嚴急則奸宄固無所容身而善良亦不免擾累矣總之爲政以得人爲要用得其人自能因地制宜順時敷教若不得人縱奇策神術徒美聽聞耳於事何濟○辛卯裁直隸張家口協標左營守備一○甲午貴州古州總兵官韓勳奏上年七月苗人老包等捏造出有苗王之語當被拏獲交審嗣經釋放今年二月內古州屬之八妹高表等寨聽信妖言糾集苗眾滋事妄行臣差撥兵丁躡探確實卽派兵彈壓二十五日各寨頑苗同聲響應圍攻汎城將沿途安設之塘房毀壞而藏弩等寨遂與八妹同謀糾結遠近附和官兵奮力勦禦殺死頑苗多人並將六寨搗毀臣等差遣嚮導通事人傳諭各寨令將倡首糾結之人獻出見據樂鄉等六寨各將首犯拏解懇求



招安得旨八妹高表等寨地處險僻離鎮協較遠巡歷難周此番蠢動雖係奸苗煽誘糾眾妄行然揆厥情事或因騷擾或因恐嚇遂至激成事端俱未可定不然以二萬苗眾若早蓄異謀何以旋聚旋散官兵一出卽悔罪來歸並無自固之詭計耶除捏造謠言及倡首糾結之人著督撫提鎮嚴緝勒獻審明按律治罪外其起事根由務期確實查出不得絲毫粉飾寬縱以致長奸貽害且上年七月卽有苗人老包等捏造苗王之語嗣經釋放是上年造言之人未經根究殊屬怠忽今八妹等寨雖經懲創然旣已爲非終懷疑懼况造言倡亂之奸苗尙未盡除餘眾驟難甯貼著該督撫提鎮剴切曉諭苗人勿蹈前轍致干勦除並飭文武官弁畱心訪察嚴禁兵役騷擾等弊以安苗眾○戊子予故禮部尙書吳襄祭葬諡文簡○己亥定邊左副將軍額駙策凌遵旨議奏噶爾丹策

零請以哲爾格西拉胡魯蘇爲我喀爾喀遊牧地界查從前喀爾喀遊牧地界尙未至哲爾格西拉胡魯蘇地方應卽照伊所請行但我卡倫原在阿爾泰迤東勒貝和邵和通鄂博布延圖科布多托羅和烏蘭等處安設此係哲爾格西哲胡魯蘇界外應議定將我卡倫照舊安設至厄魯特遊牧應以額爾齊斯爲止如伊不遵或以阿爾泰嶺爲界不得越過哈巴博爾濟阿里克泰清吉爾等處至中間交壤之處彼此俱毋得打牲嗣後阿爾泰迤東令我處巡邏迤西令彼處巡邏如此庶爭端可以永息再準噶爾策妄阿喇布坦在時其遊牧原在河泊克薩里察罕胡濟爾迤西數年以來漸越額爾齊斯賊夷素性狡詐反覆無常使伊遊牧相逼太近則防守實難斷勿令過阿爾泰嶺方爲善策報聞

夏四月癸卯諭內閣敎習舉人貢生多係不應卽選之人考取補

用卽三年期滿不過勤於訓課其職易稱止宜量加議敘以示鼓勵從前議以知縣敎職卽用未免太優且中式進士之人尙須分部學習挨班銓選知縣若科分甚淺之舉人敎習三年遽行卽用遲速轉覺相懸殊屬太驟至舉人銓選敎職亦須照依科分歷久方能挨補今以近科舉貢敎習期滿俱准卽用以致年久應選之人轉多壅滯於銓法亦未均平其應如何酌定班次分別選用之處著吏部詳議○甲辰諭內閣縣令爲親民之官關係民生休戚最爲切近是以自古帝王慎重司牧之選以端化民成俗之源朕亦屢降諭旨若果縣令皆得其人各治其邑各子其民竟可使閭閻之中無一夫失所此非誇大之論也凡選用知縣者內多進士舉人出身之人其中才具可觀克稱厥職者固多而年老迂疏不諳吏治者亦復不少朕念其攻苦寒窗幸登科目不忍遽令放廢

是用定以改敎之例俾得邀一命之榮且居師儒秉鐸之席此朕  
隨材器使委曲成全之至意也况改補敎職之後若果敎士有方  
通曉吏治仍可膺卓異薦舉以爲上進之路此又在本人之自勉  
並非限以敎職終身也每見候選各員年老才庸不稱縣令之職  
而苦不自量仍欲勉強謁選其意蓋以縣令爲榮希圖僥倖且以  
到任之後不能辦事仍可改補敎職無礙於功名故爲苟且姑試  
之計殊不思邑宰之職民社攸關以不能勝任之人冒昧銓選及  
到任之後試看一年半載再請改敎其閒展轉更換時日已多事  
務廢弛之患有必不能免者豈非庸碌貪位之人貽之咎耶嗣後  
科目出身之員若係揀選命往者到任後不勝縣令之任准該督  
撫以敎職題請改補如係月選之員或年力衰邁或才識庸愚卽  
當於未選之先或臨選之際呈請改敎若不自度量仍欲銓選知

縣該員到任後著該督撫留心察看或以才力不及或以溺職分別題參不得奏請改敎以遂其自便之私如果有爲人謹慎學問優通者著該督撫將應否改敎之處具本聲明送部引見請旨○

乙巳頒

聖祖仁皇帝御製全集賜諸王大臣翰詹官員等隨具

摺恭謝得旨俱著往

恩佑寺謝恩○

溫而遜緣事革職調王

爲山西布政使以張鳴鈞爲直隸布政使繆孔昭爲河南按察使

由舊河道

○丁巳諭內閣廣東開採一事十數年來內外臣工奏請

者甚多朕悉未准行上年總督鄂彌達巡撫楊永斌奏開採以資鼓鑄於粵民生計大有裨益言之再三朕發九卿確議旋經議覆准行後復有數人條陳極言其不應行今朕再三思維廣東近年以來年穀順成米價平減盜賊漸少地方甯靖與從前風景迥異今若舉開採之事聚集多人其中良頑不一難以稽察約束恐爲

閭閻之擾累况本地有司見在勸民開墾彼謀生務本之良民正可用力於南畝何必爲此傲倖貪得之計以長喧囂爭競之風此時正在計議之初停止甚易著該部卽行文該省督撫令其遵諭停止○戊午吏部議准署西安巡撫史貽直奏陝西直隸同州請升爲同州府裁知州州同吏目缺設知府通判經歷各一改西安府撫民同知爲同州府撫民同知增置附郭一縣設知縣典史各一並同州原轄之朝邑郃陽韓城澄城四縣暨直隸華州與所屬之華陰蒲城潼關三縣及見屬直隸耀州之白水一縣俱歸同州府轄其直隸耀州與所屬同官一縣改歸西安府轄從之尋定新設同州府附郭縣曰大荔○乙丑以德希壽爲左副都御史

由直隸通

承道

閏四月辛未改貴州思南營守備爲中軍守備增遊擊一歸銅仁

協轄遵義黔西二協各裁都司一守備一改左營爲中軍都司右

營爲守備○甲戌對琳緣事革職以七克新署盛京工部侍郎

御

史○戊寅禮部議覆升任提督順天學政吳應棻奏博野縣生員

鄭景洙妻吳氏等九人俱痛夫身故慷慨捐軀請予旌表以維風

化查婦女激烈輕生向經禁止今應否旌表請旨遵行得旨吳氏

等著予旌表凡烈婦輕生從死昔年 聖祖仁皇帝曾降旨禁止

朕於雍正六年又降旨曉諭至明且悉數年以來因各省奏請旌

表烈婦者尙少朕是以格外加恩准其旌表今數日之內題奏殉

夫盡節之烈婦烈女如此之多可見地方官未將從前諭旨剴切

曉諭鄉曲愚民尙未深悉 聖祖仁皇帝與朕重惜民命之至意

以致民間婦女激烈捐軀者更多於前嗣後若概予旌表恐轉相

則效易致戕生深可憫惻著地方有司將朕前旨廣爲宣布俾遐

陬僻壤家諭戶曉儻宣諭之後仍有不顧軀命輕生從死者不必  
概予旌表以長閭閻憤激之風○己卯雲貴總督尹繼善奏台拱  
古州兩鎮見今會勦奸苗其事起於奸苗圖騙銀錢造言誑惑古  
州文武不能善爲彈壓一聞聚集之信不卽迅速擒拏漸至附和  
勾結鎮臣韓勳撥兵王嶺擊散眾苗不卽行追捕致令蔓延均難  
辭咎俟事竣詳查具奏報聞○辛卯加湖南辰永靖道兵備銜○  
乙未諭內閣據河東總督王士俊奏稱山東安山湖地勢低於運  
河其湖旁涸出之地請分別開墾以濟民食等語山東運河之水  
全賴諸湖停蓄以資灌注所以前人有水櫃之名後因諸湖淤墊  
附近居民侵占爲田以致水少不能濟運大有關於漕務經朕屢  
降諭旨令河道總督等悉心經理近年始無水淺停舟之慮今王  
士俊所奏乃爲開墾起見朕思湖水專資濟運儻或經理之初但



貪田畝之有餘而不計湖水之不足將來田多水少漕運稽遲則顧此失彼未免輕重倒置不可不慎之於始也著交部詳確速議具奏尋議運道深通全賴諸湖蓄洩卽竭力疏濬尙恐淤墊未便改淤爲田有妨濟運應令該督會同總河確勘具題再議得旨湖緒蓄洩專爲濟運王士俊奏請開墾爲田止據委員張體仁等一面之詞並未親身歷勘遂欲舉行甚屬草率此乃必不可行之事毫無疑義亦無庸再行確勘王士俊所奏不准行○丁酉敕諭準噶爾台吉噶爾丹策零曰朕軫念眾庶止息兵戈振興黃教安逸生靈用是特遣使臣降旨宣諭爾極悅服遣垂納木喀等進貢齋表內稱若使後世言某皇帝與某台吉失好以致眾生勞苦殊非美名若互相和好振興黃教安逸生靈則可垂休聲於永久等語朕披覽之際不勝嘉許欣悅果能知此天必錫之以福若不知此

惟以貪暴爲事則天亦必加之以禍此常理也至於構兵之由爾  
意若自朕始者昔我 聖祖皇考時眾云準噶爾之人秉性貪暴  
好尙兵戈侵擾鄰封不崇釋氏仁慈之道彼時朕猶未深信後爾  
父策妄阿喇布坦無端侵我哈密又遣兵赴藏擾亂佛教殘毀寺  
廟傷害喇嘛朕始知前言不妄似此則兩路之駐兵防範謂始自  
我 皇考可乎我 皇考聖心仁愛惟欲安撫眾生故遣使往來  
數次乃爾父推託遷延始終無定朕續承大統爾父又遣根頓來  
京朕仰體 皇考仁愛之心仍欲和好俾黃教振興生靈安逸令  
根頓至朕前親執其手諭云爾回時可告知爾台吉朕執爾之手  
卽如見爾台吉之面朕與爾台吉應俱教訓子孫輩令其永遠和  
好於是遣使議和定界詎意爾父並無和好之意屢次託故遷延  
且藏匿我朝之逃亡羅卜藏丹津並未告知使臣以致諸事未成

和議中止自此朕亦未遣使前去爾亦不遣使來京後爾父物故爾遣特磊奏云爾父已成佛矣不思佛爲天下人之所尊禮者爾云成佛其誰尊禮乎且特磊舉動驕慢不知禮法是以朕諭特磊云爾台吉若果誠心遵旨和好可將羅卜藏丹津解送前來並將邊疆定界朕豈有遣發大兵之理乃爾之和好未定則爾意實未可測不得不爲防範故兩路有駐兵之舉及爾又遣特磊前來奏稱羅卜藏丹津已解至中途聞大兵發遣是以中止爾若果將羅卜藏丹津解送自應直到軍營何以中途而返耶朕因解送羅卜藏丹津之言涉於虛妄故於特磊同時令部內加以拂意之言責以難行之事然並未勒令遵行也若果勒令遵行自應寫入敕諭之內乃不寫入敕諭止於部內行文者特令爾知非朕意也爾縱有難行之處亦應聲明陳奏何以並無回覆而於使臣在巴爾庫

爾軍營等候之際潛兵盜我馬匹此非構兵自爾乎我兵果欲進  
剿則於特昂去後乘爾兵無備之時不行襲擊轉俟爾兵有備有  
是理乎此俱已往之事朕既軫念眾生將爾從前過愆悉已寬宥  
無庸置議今爾既遵循禮義敬奉朕旨歡悅順從欲修和好遣使  
來京朕心甚嘉之再爾使垂納木喀等口奏從前曾言將羅卜藏  
丹津解送俟大事定後不難辦理至定界一事阿爾泰原係厄魯  
特游牧之地杭愛原係喀爾喀游牧之地請由哲爾格西拉胡魯  
蘇等處至巴爾庫爾地方定爲邊界等語羅卜藏丹津爾從前既  
屢奏解送卽與解送無異但所云阿爾泰係厄魯特游牧之地此  
噶爾丹從前之事噶爾丹爲我兵剿滅取其土地並其骨殖子孫  
俱經爾父獻納此眾人所共知者見今噶爾丹之屬人及丹濟拉  
之子孫俱在內地爾準噶爾曾未越阿爾泰游牧居住乃謂爲厄

魯特遊牧之地可乎且喀爾喀等尙不令近阿爾泰遊牧者原欲使兩界相隔稍遠可息爭端而可令準噶爾之人居此乎夫永遠和好之事定界實爲要議朕特命大臣等與垂納木喀等公同酌議務期兩有裨益指定邊界具奏而垂納木喀等云我台吉所交口奏言詞之外並無別語不便擅定等語此事在京旣不能定議用是再頒敕諭遣來使垂納木喀等齎回若果誠心修好疆界不可不明設日後無知之人越界妄行稍有爭競則又生事端矣況定界之說原起於爾父策妄阿喇布坦奏請以安眾生者彼時朕曾降旨嘉許後又請將阿爾泰山梁外哈道里哈達清吉爾布喇清吉爾兩處不必置爲閒地朕未准行今特欲安逸眾生永遠和好將此兩處空閒之地俱屬於爾止自克木齊克汗騰格里上阿爾泰山梁由索爾畢嶺下哈布塔克拜塔克之中過烏蘭烏蘇直

抵噶斯口爲界並將爾父所請自胡遜托輝至哈喇巴爾魯克悉作空閒之地似此分界在爾並無難行不便之處爾其仰體朕加恩眷注之意遵諭定界方可永遠修好朕爲天下主惟思扶持黃教利濟眾生敦崇和睦執中循禮斷不强汝以難行者至於不便大國之處亦不能俯允爾請也儻爾遵奉諭旨議定疆界之後猶以喀爾喀之遊牧逼近爾屬不免疑懼奏請稍展空閒之地亦屬可行俟爾遣使再來陳奏時朕當另降諭旨台吉其熟思詳審酌定具奏並賞給噶爾丹策零各色段十匹○戊戌諭內閣各省秋審定例該督撫會同司道等官審錄分晰情實緩決矜疑具題關繫最爲重大向聞外省會審之時不論案件多寡務於一日之內悉行定議一切俱聽督撫主張不特守令不敢置喙卽司道亦無一辭輕重定於俄頃之間是非決於一人之口究其實際督撫亦

未必了然不過令幕客糊一路節貼於冊上徒飾觀瞻而已況有  
席毼懸彩鼓吹喧闐日甫踰中卽退而肆筵行酒竟有似於宴會  
之禮者甚至召令優人演劇爲樂近來曉明義禮者多各檢點而  
此風猶未盡革夫刑罰者國家不得已而用之者也天以父母斯  
民之責畀之吾君臣凡茲犯法獲罪之民皆吾赤子也平時不能  
撫綏化導使之遵守法度免於罪愆已有忝於教養之職矣及陷  
於刑辟之後又復視爲泛常不察情罪之輕重率定爰書之出入  
寬所不當寬而嚴所不當嚴以致讞獄不得其平冤情抑而莫訴  
勸懲兩失兇暴肆行所謂明刑弼教者安在清夜捫心能無愧赧  
乎朕自臨御以來於一切刑名案件莫不虛衷斂息詳慎推研每  
於法司所進立決本章悉令內廷管本官員三次覆奏然後批發  
每年秋審朝審時朕先將招冊細細披覽及至勾到之日復面與

大學士刑部堂官等往復講論至再至三然後降旨蓋哀矜惻怛之意動於不能已而發於不自知並非欲博欽恤好生之名於天下臣民也 聖祖當年於句到日皆著素服朕亦效法行之凡爲督撫大臣者受朕封疆之寄應與朕同此哀矜惻怛之心乃各省秋審大約皆於一日之間草率定局並未博採羣議詳察實情不過視秋審爲具文於會審之日雖不便穿著素服豈有結綵設席徵歌演劇之理此則殘忍性成不學無術者之所爲嗣後各省秋審時該督撫務率司道等官敬慎周詳殫心辦理必使權衡不爽情罪相符向來並無限期何妨多寬時日安得視爲虛文故套輕忽民命以供其自便之私至於會集既久除日食常餐外儻有肆筵設席仍蹈從前陋習者經朕訪聞必嚴加議處○命內大臣常賚統畱駐巴爾庫爾兵丁以鎮安將軍印給之提督顏清如原任



尙書馬會伯協同辦事○己亥禮部議覆河東總督王士俊奏請  
奉祀先蠶臣等謹按蠶神名號周禮鄭注上引房星以馬祖爲蠶  
神然蠶固與馬同出於天駟而天駟可謂馬祖實非先蠶誠如李  
釋之論淮南子引蠶經黃帝元妃西陵氏始蠶蓋黃帝制作衣裳  
自此始也漢記苑窳婦人寓氏公主事屬無稽查禮記享祀先蠶  
不著名號隨建先蠶壇於宮北三里爲壇高四尺唐會要遺有司  
享先蠶如先農宋景德三年詔祠先蠶依先農例遣官攝事本於  
周禮有宗伯攝祭之文也前明釐正祀典山川百神各依本號如  
農始炎帝止稱先農之神則蠶始黃帝亦應止稱先蠶之神再周  
制蠶於北郊其壇應設於北郊祭日用季春吉巳一切壇制祭品  
俱視先農典禮京師爲首善之地應於北郊建壇奉祀屆期派禮  
部堂官一員承祭通行直省各府州縣一體遵行從之

五月癸卯諭大學士等據湖廣總督邁柱等陸續奏報台拱逆苗不法情形黃平施秉一帶俱遭其擾害似此則黃平以西之重安江驛凱里汎及大風洞地方施秉偏東之青溪所屬及焦西地方周圍二三百里恐皆不免踐踏朕心深爲慮念其鎮遠府城雖稱賊攻甚急但既有土兵三千星往援剿賊眾自然解散黃平州之西卽緊接清平縣有哈元生在彼料理自可無慮惟是此番苗變旣句結熟苗漢奸料難卽速平靖甯可多備楚兵以資調遣著總督邁柱提督董芳等再撥兵二千名陸續前進協力嚴剿以除兇逆至賊苗敗遁之後必仍歸還巢穴其助惡熟苗漢奸知無所逃勢必唆令攻打古州等處亦不可不豫爲籌畫著廣西巡撫金鉷提督霍昇卽派精銳三千名選才能大員統領以二千名由洪江一路徑到黎平進古州背後應援彈壓以一千名由河路至平宇

一帶防範下江以備相機調遣爾等可密寄信前去其有應行就  
近辦理事宜著湖廣廣西督撫提鎮等一面探聽信息相度機宜  
辦理一面奏聞務期妥協○乙巳以阿克敦署工部左侍郎

由領外內

閣學士署

○丙午諭內閣朕覽刑部侍郎申珠渾等查審鄂昌一案其

中多避重就輕瞻徇隱漏之處鄂昌以戶部司官簡用監司之職  
因其歷任上司皆極口稱之朕見其年力精壯尙屬明白曉事又  
係大學士鄂爾泰之姪自然恪遵伊叔之教努力向上以報國恩  
是以不次超擢用爲四川巡撫乃伊蒞任以來所辦事件種種乖  
張顛倒國法大抵性情狂妄而又沈湎於酒以致糊塗昏憤至於  
如此鄂昌旣負朕擢用之深恩又玷伊叔鄂爾泰之顏面論情論  
理均屬可惡不可不加重懲著革職解來京交與刑部將摺內  
查審不到之處另行嚴審定擬具奏按察使高維新以科員用至

潘臬大員之職且屢次寬其處分仍畱在任乃不知感戴朕恩抒  
誠報效竟以專掌之刑名視同膜外聽從鄂昌黏籤發司草率結  
案永甯道劉嵩齡以新進小臣擢用御史復用道員在川數年因  
循塞責不思殫心職守止以逢迎上司爲務今私將銀瓶盛酒巧  
於餽送大玷官箴高維新劉嵩齡俱著革職掣解來京交部審訊  
定擬具奏○癸丑王蘭生緣事降調以吳家騏爲內閣學士

由翰林院

侍讀學士

○丁巳諭大學士等前湖廣督撫提鎮奏報台拱逆苗不

法情形比卽降旨與湖廣督提於調發官兵三千名外再撥官兵  
二千名陸續前進以備征剿之用又諭廣西撫提派撥精兵三千  
名分爲兩路前往以資應援彈壓今覽尹繼善奏摺其所檄調鄰  
省官兵之處與朕諭旨相符計此時進剿之兵合四省計之已二  
萬有餘哈元生親在軍前統領調度諒自有平定之策爾等可傳

諭哈元生乘此兵威須將清江台拱上下九股兇苗及內地倡首  
附逆惡寨痛加剿除務盡根株不貽後患其遠寨偏脅附從各苗  
有悔罪求撫者皆令盡繳器械然後准撫儻敢抗違不繳亦相機  
剿除如此辦理方能一勞永逸若其中有勢不可行之處可據實  
奏聞但毋稍存姑息之念陽奉陰違令異日更起事端哈元生統  
領四省官兵著授爲將軍凡赴援將弁俱聽伊節制調遣其將軍  
名號敕印爾等議奏請旨速行頒發尋命哈元生爲揚威將軍○  
己未增河南分巡河陝汝道一駐紮陝州撥原隸開歸道轄之河  
南一府陝州一州並隸南汝道轄之汝州一州俱歸新設道員轄  
改分守開歸道爲分守糧驛鹽道撥原轄之開歸陳許四府俱歸  
管河兵備道轄○庚申以李如蘭爲四川按察使由雲南糧道遷○癸亥  
諭內閣據山西巡撫覺羅石麟奏稱陽曲汾陽兩縣紳衿士民李

杭卞時盛等情願各捐銀兩存貯公所以爲周恤比閭之資臣見在與各該地方官公同酌議或置田地或爲營運因地制宜以垂永久等語夫所謂樂善好施扶危濟困者大抵於水旱饑饉之歲散財發粟賑救羣黎又或於平常無事之時造義倉以儲米穀修橋路以便行人或置敦宗贍族之田或立養老育嬰之所凡此善事多端必須出自本人之誠心而又親身經理誼同休戚始可以惠鄉閭而收實效今石麟奏稱陽曲汾陽兩縣紳衿士民願捐銀兩存貯公所其作何措置之處俟與地方官公同酌議是該處並無見在應辦之事此乃另開捐納之條也若遇無才之有司經理不善必致爲胥吏之所中飽土棍之所侵蝕而不能裨益於貧乏之鄉人此人人能料及者而石麟如此辦理是何意見陽曲汾陽紳衿士民等旣已捐助其樂善好施之念可嘉著將石麟奏摺及

開報名單交部分別議敘並令石麟將各姓所捐之銀妥商位置務令地方得受實益勿致虛糜向後若有無故捐銀交官者與朕原旨不符俱著停止○甲子 上命果親王允禮 皇四子寶親王 皇五子和親王弘晝及大學士鄂爾泰張廷玉尙書慶復魏廷珍憲德張照徐本都統李禧甘國璧侍郎呂耀曾俱辦理苗疆事務○諭辦理苗疆事務王大臣等貴州台拱逆苗不法擾害黃平地方居民四散躲避朕心恐其流離甚爲軫念應令鄰省官員凡有來至該地方界內者務須加意綏撫悉心賑恤或應派在京大臣前往或應卽交與該督撫料理之處爾等速議具奏再赴黔會勘官兵雲集糧餉最爲緊要應作何運送協濟之法爾等一併速議具奏尋議逆苗不法被擾之居民順苗有逃避他所者該州縣務須安插得宜計口授食俱動用倉穀庫銀賑恤仍請欽差大

臣一員前往撫綏稽查務令得所至會勦官兵糧餉請令湖廣督撫酌撥務須充裕接濟並令兩廣總督鄂彌達悉心妥辦得旨依議著刑部尙書張照副都御史德希壽馳驛前往○諭內閣工部尙書巴泰向在 聖祖仁皇帝時歷官有年因其居心巧詐諸事摸稜毫無建白之處已經棄置數十年不復起用朕卽位以來因部中乏老成之臣念伊居官年久經歷有素尙非新進之人可比特加遷擢用爲大員乃伊在任巧詐性成全無報效嗣因北路軍前辦事需員命伊前往管理糧務伊在彼數年並無勞心辦理之事此眾所共知者朕以其年已七旬奉差在外特令回京俾得休息又值滿洲九卿內見在敘俸年深者甚少因用爲工部尙書伊若具有天良自應感戴重恩及其餘年努力奮勉以稱要職乃伊於工部事件仍一味因循推諉視爲局外於己無涉且將舊定章



程任意更改經果親王差回屢次參奏朕料其意以爲但能潔己沽名卽可自全殊不知竊位苟容致令諸務闕冗廢弛乃臣子之大戒巴泰身爲正卿且受朕格外恩遇而忍如此居心行事必有其故前伊自軍前回時朕曾詢問軍營之事伊除收發軍糧外一切皆云不知似此則其蒼滑之習全未悛改真可謂下愚不移者矣巴泰著革職凡內外臣工身膺職掌務須殫精竭力圖報國恩大小諸事悉心整頓此乃人臣之常分若但知潔己而不知奉公國家亦安用此木偶爲也如果實心爲國之人便有錯誤朕必原諒而保全之如彼馬齊高其倬魏廷珍甘國璧等非不能辦事之人乃習成巧術自謂保身遠害藉爲推卸之計此風有妨於政治無益於國家况將來後進效尤其弊有不可勝言者朕每加恩於諸大臣其子孫亦多擢用所以嘉其爲國之心也若遇虛圖自全

罔顧國事者彼既視國家爲陌路朕豈肯委曲成全以遂其私心  
向後若必不肯改悔朕不但不成全伊等之生前卽伊之子孫若  
非有卓越之才朕必不加恩錄用所以儆戒臣工俾各猛省以除  
陋習內外臣工其咸知朕意○乙丑裁山西浚井開泥沙濶平刑  
等四驛驛丞○丙寅諭辦理軍機大臣等準噶爾使臣垂納木喀  
等到巴爾庫爾軍營起身後著副將軍張廣泗回至西安候旨另  
有用處○丁卯諭辦理苗疆事王大臣等據哈元生元展成奏報  
古州逆苗不法臣哈元生於四月二十日馳赴軍前調度閏四月  
三十五月初一等日副將紀龍周儀署參將哈尙德崔傑等各領  
官兵分路擊殺逆苗奔逃斬獲無算驛路開通黃平一帶地方居  
民復業及時耕種等語前黃平一帶居民被逆苗擾害時朕心深  
爲軫念已經降旨諭令督撫動撥正項錢糧確查賑恤今民人復

業之初或仍有遷徙未回及資生無力者著元展成遴選賢員招徠安插加意撫綏勿令一人失所此次哈元生進剿已降旨授爲揚威將軍所有在事有功將弁兵丁俟事竣查明分別議敘其附賊之逆寨餘黨應剿應撫之處著哈元生酌量辦理據元展成奏摺內稱黃平地方爲倉廩監獄重地逼近苗疆從前何意止設官兵三十名被賊侵擾而伊平時全不留心籌及亦不具奏請旨以致倉卒無備甚屬溺職今官兵到彼賊苗回避乃自然之情勢而元展成奏報之時不自知從前辦理之非大言不慚似有以地方復舊爲幸之意甚屬不合事畢論其功過著交部嚴察議奏

六月乙亥諭戶部各省從前辦公無項可動上下共相捐應官民並受其累卽各官薪米之需皆取給於該地方之耗羨而地方大小不一多寡亦不均平往往不能固其所守此人人洞悉其弊者

山西巡撫諾岷始請提解耗羨之法後各省督撫次第效法將經年費用之款項衙門事務之繁簡議定公費派給養廉俾公事私用咸足取資自行此法以來吏治稍得激清閭閻咸免擾累此中利益乃內外所共知共見者各省布政司職掌錢糧之總匯自應加意慎重其應批解者隨時查催不使拖欠其應支給者嚴加稽覈不致冒濫庶財用常充而官民永受其益乃數年以來朕畱心體察外省布政使中竟有庸劣無識之人將此項銀兩視爲無足重輕之物而不念其爲民脂民膏或那補借支或任意費用前任含糊交代後任不便深求竟將有關國計民生之項漸成紙上空談而督撫亦不查察似此日久愈難清楚矣在當日舉行之初朕原降旨此事若善於奉行則地方可受其益儻奉行之不善則地方轉受其累各省之能行與否總聽該督撫自爲酌量並未強其

一例通行也今覽近日情形恐漸有不妥之處將來貽人以口實則非朕准行之本意也著戶部先行查明各省公費養廉銀兩其有按年造冊咨送查覈無差者無庸清查外其並未造冊咨送及雖有冊籍而籠統開造者其中必有不清之處卽著勒定限期令造清冊送部查覈至於清查之法應自該省議定公費養廉之年分起至前任卸事之日止將額徵公費完欠雜支同餘贍未給各數目按年歸款各官養廉照依正署起止月日應得分數並扣除空缺逐一徹底清查其收數內有拖欠未完者分別可否著追其支數內有透動加增者分別是否應給見在各年應存銀兩有無那移虧缺分晰接受催追著落完補嗣後按年分晰造冊隨同奏銷錢糧各冊咨送戶部覈銷如此則各省存公銀兩可以漸次清理而接任各官收支亦必慎重於國計民生均有裨益矣○辛巳

刑部議奏諾爾渾參奏福祿軍前鑽營各款並無實蹟但福祿係允禩心腹用人行止不端應擬斬監候得旨前據諾爾渾密奏福祿乃允禩心腹用人心術行止俱不可問於北路出兵時營求派往伊到軍前毫無效力之處又復鑽營該管諸大臣由護軍校委放閒散章京復委副參領又署理掌管緊要軍機兵部員外郎似此匪人竟充要職恐撓亂與洩漏皆於軍機未便等語朕因覽諾爾渾所奏福祿秉性姦邪存心叵測種種夤緣鑽刺之處大干法紀是以降旨拏解回京交與刑部嚴審定議今覽刑部審訊情由福祿出兵數年並無過犯且在和通胡爾哈殺賊受傷得受恩賞又曾派往科布多隨征效力凡諾爾渾所奏蠱惑擾亂洩漏軍機皆全無影響之事且諾爾渾狡猾乖張近日諸事敗露此卽伊造言誑奏之一端也福祿著釋放其諾爾渾原摺著發出與福祿並

默目閱看並令在廷臣工共知之朕待天下臣民無不予以改過  
自新之路卽如阿其那塞思黑隆科多年羹堯之黨與屬下朕加  
恩錄用者不可勝數並無成心豈以福祿爲允職舊屬而存刻待  
之意該部旣審無實蹟且有行間效力之勞便當據實奏聞請旨  
豈有不審實情誤引律條擬以大辟之理著嚴飭行○癸未以查  
克旦爲工部尙書額外尙書○甲申禮部議覆貴州學政晏斯盛奏黎  
平府屬亮寨正長官龍紹儉呈稱由生員出身請應科舉查龍紹  
儉旣已承襲土官不便准其鄉試得旨土司龍紹儉原由生員出  
身旣有志觀光陳請科舉准其一體應試若得中式其土司世職  
著伊將應襲之人舉出承襲○丁亥諭內閣見今道府出缺甚多  
一時不得勝任之員著在京三品以上滿漢官員於見任科道部  
屬及知府同知知州通判知縣內各舉一人或勝道員之任或勝

知府之任填註明白於三日內交送內閣彙齊奏聞候朕簡用若所舉有相同者亦准彙奏伊等身爲大臣歷官年久豈無深知確見之一人可膺保薦者况奉朕特旨尤當矢公矢慎以副朕諮詢之意儻懷挾私心瞻徇情面將來所舉之人或有不端劣蹟或不能勝任定將原保舉之大員嚴加議處○庚寅吏部議准貴州巡撫元展成奏平越府知府朱東啓患病請回籍調理俟病痊起用得旨向來外任官員告病者卽行休致無病痊復用之例朕從愛惜人材起見特准各省督撫酌量若屬員內居官素優而患病是實者於告病本中聲明將來病痊仍行引見補用此朕體恤成全之大恩也近於引見之時見起用各員本無大恙調治未久卽赴部銓補者甚多則患病之不實顯然矣又有借名告病而巧爲規避者或因繼起有人囊橐豐厚冀娛晚景或因民俗刁悍地方繁



劇慮及考成其該管上司但見屬員不戀官職遂爾代題而不覺受巧宦之欺蒙也今且言一二人如原任福建漳州府知府王之琦同知王時邦等皆因地方繁劇而託詞告休者本皆精神強健並非實病得請之後譙樂歡遊朕知之最確似此者各省不可枚舉今元展成題請平越府知府朱東啓告假回籍調理俟病痊起用明係該員畏懼苗疆而爲此規避之計朱東啓著解任仍畱黔省調理俟病痊之日自黔送部引見將來有似此告病該督撫題請病痊起用者俱著畱於該省調理不准回籍俟病痊之日該督撫送部引見若永遠告休不請起用者該督撫司道必察其患病果實一時難痊或年老力衰不能辦事然後照例申詳題達備受屬員之欺蒙或徇平日之情面仍蹈故轍經朕訪聞必將該上司從重議處○辛卯諭內閣自古地方官員有進獻方物之禮蓋以

地土所產貢之於君所以將其誠意爲其君者鑒其意而酌納所以篤堂廉之誼聯上下之情也朕卽位以來亦循照舊例聞有進獻珍寶古玩者朕槩降旨停止向來鎮臣中亦有隨督撫進獻者朕皆諭止之至於所獻之物備隨時賞賜內外臣工以示眾人一體之意並非朕所需用而收貯內府也雖臣之效忠於上君之加恩於下不在乎此然亦儀文禮節之一端所以歷來未廢凡爲督撫者旣以此將其誠敬之惻則當於採辦之時厚其價值俾所屬官民歡欣從事方爲事君盡禮之實心乃朕向聞各省大員採備貢物有恃上司體勢發價減少者以致民間受累視爲畏途如榆次不敢種好瓜肅甯畏植好桃外間傳爲話柄近朕訪聞福建採買柑果有短價累地方官民之處則與君臣聯接之本懷大相違背朕豈肯爲此無益之儀文而令承辦之微員貿易之百姓或受

擾累哉以貢物而累閭閻萬萬不可卽或交與屬員代辦而價值不敷令其暗中賠補是又假公濟私收受賄賂之巧術也似此食用微物朕發價市買何所不得豈肯私毫累及地方可通行曉諭督撫等自接奉此旨爲始著將從前貢物之數再減一半儻仍蹈舊轍朕必將各省貢獻之例全行禁止○貴州巡撫元展成參奏都勻府屬之清平知縣邱仲胆當逆苗圍攻凱里之時嚴諭民人不得豫行逃避及見賊勢兇橫該縣卽回清平凱里被災逆苗圍城又不能巡查防守致奸苗入城放火監犯悉行免脫再有平越府之平越知縣楊興道提臣統兵駐紮楊老驛隘口一切軍裝糧運飾詞推諉阻滯不前邱仲胆畏縮無能楊興道推諉玩延均難姑容特疏題參請旨革職得旨邱仲胆身爲縣令見賊勢兇橫驚惶潛避全無防守稽查以致奸苗入城放火疏縱獄囚大干法紀

楊興道將糧餉軍裝推諉阻滯甚屬可惡著革職拏交總督尹繼  
善嚴審定擬似此犯法劣員元展成止請革職並無審擬字樣顯  
係巧於徇庇俟軍務竣後將元展成交部嚴察議奏○壬辰辦理  
軍機大臣等議准署陝西總督劉於義奏肅州軍興以來運糧車  
夫採割草束夫役既係陝甘無業貧民流寓傭作以爲度日之計  
不下萬人目今大兵凱旋此輩窮民一無事事難以自給日則散  
在市廛夜則居宿古廟日復一日恐至流入匪類應卽令沿途地  
方官給與口糧派佐雜千把外委解送回籍安插從之○福建提  
督王郡奏呂宋國以麥收歉薄今附洋船載穀二千石銀二千兩  
海參七百斤來廈賣銀糴麥多則三千石少則二千石查五穀不  
許出洋律有明禁今呂宋以穀易麥臣與督臣撫臣見在商酌請  
旨欽定得旨朕統御寰區內外皆爲一體呂宋雖隔重洋朕心

並無歧視國家之所以嚴禁五穀不許出洋者乃杜奸商匪類私販私載暗生事端之弊若該國偶缺米糧以實情奏聞於朕朕尙酌量豐餘以濟之今呂宋以麥收歉薄載穀易麥更爲情理之當從者著該督撫等轉飭有司按照穀麥時價均平糴糴不許內地之抑勒欺詐俾番船載麥回國以濟其用並將朕旨傳諭來商知之○丙申諭辦理苗疆事務王大臣等黔省逆苗不法擾害黃平一帶村莊哈元生等領兵進剿逆苗雖聞風逃遁仍敢盤踞山梁爲負隅之技前已降旨授哈元生爲揚威將軍專司征討惟是苗黨眾多地方遼闊見調四省官兵甚多滇黔之兵從上游前進湖廣之兵從下游前進其中相隔路遠哈元生調遣難周湖廣提督董芳熟悉苗地情形著授爲副將軍一切剿撫機宜著與哈元生和衷協力公同辦理目前或應分領夾擊將來如何彈壓安置俱

著哈元生董芳悉心籌畫務期妥協以副朕委任之至意董芳著馳驛前往○辦理苗疆事務王大臣等遵旨議奏黔省逆苗不法黨類眾多地方遼闊見調四省官兵會剿眾至三萬前已授哈元生爲揚威將軍統領官兵聽其調遣查滇黔進剿之兵須從上游前進湖廣之兵須從下游前進兩路之兵須從黎平一路前進古州兵分三路機勢各有不同哈元生一人調度指示或恐鞭長不及轉致稽遲今湖廣提督董芳熟悉苗疆情形已授爲副將軍與哈元生協同料理查楚兵五千原係董芳所轄應聽董芳調遣而粵東粵西官兵八千名前進古州若古州等處無庸八千全數所餘之兵應並令董芳統率調度至哈元生見駐紮老地方其上游調來之滇黔漢土官兵共一萬數千餘名應聽哈元生統率調度與董芳分領夾攻毋致耽誤儻兩路有會合進擊及彼此互調之

處務令和衷商酌知會照應不得參差重複有誤機宜至內地清理之後哈元生卽應酌帶各省鎮弁前進苗疆統率勦撫而內地各寨應彈壓安置並於附近苗疆要隘駐兵應援之處應令董芳辦理其哈元生董芳所辦事件兩人互行知會並令知會撫定苗疆大臣張照等及該省督撫再查各省官兵已陸續到黔理應速清內地急援清江乃內地逆苗仍然猖獗而清江勝秉猶未開通且文移往來猶從僻路遞送此中情由或係兵力未齊或係逆苗阻截應令張照哈元生等據實具奏又查調撥楚省官兵赴黔原爲保護城汛勦禦逆苗之用今清溪被攻甚急鎮遠相去甚近何以鎮遠文武坐擁楚兵一千八百名之多竟不分撥救援以致縣城失守文武官員是何意見應令張照等一併秉公查奏從之○丁酉辦理苗疆事務王大臣等奏黔省台拱所屬九股逆苗不法

竄入內地侵犯城池肆行燒擄不法已極令將軍哈元生副將軍董芳統兵會剿務將逆寨兇苗並造意勾引惡類痛加剿除不得姑息竣事庶使生熟諸苗有所懲戒至附近台拱諸苗有實係協從者應令哈元生董芳按其情罪酌量辦理應行文撫定苗疆大臣張照等知之又查哈元生統領滇黔漢土官兵一萬有餘由楊老自西而東董芳帶楚兵五千由清溪自東而西地僅四百餘里兩路夾攻兵力既足敷用惟台拱等苗由清江出清平黃平等州縣外尙可由丹江而出都勻查入寨丹江之苗見在並未蠢動該協營額兵共有三千二百名足資防禦且都勻至清平路止兩站既有本營防守而董芳所統之兵亦易聯絡似可無庸增兵其黎平一路爲古州門戶官兵既進之後或逃遁諸苗以錦屏天柱等處防兵無多乘間竊發亦未可定應令董芳於兩粵八千兵內酌



撥一千名駐紮黎平府要隘之地以備應援剿捕之用又荔波縣係貴州廣西兩省交界之地雖新疆內有都江一協駐兵二千二百名而廣西又有慶遠一協貼近防範但進剿之後官兵調遣不時或苗眾逸出滋擾亦不可不豫籌應行令廣西巡撫提督就近撥兵防禦又湖廣提督董芳統兵赴黔湖南皆係苗地且逼近黔苗亦須聲威彈壓應令荊州將軍袁泰挑派滿洲官兵一千二百名令副都統一員統領前往常德駐紮其官兵起程一應事宜應令總督邁柱照例料理從之

秋七月甲辰改山東曹州泰安州俱爲府○戊申諭內閣前聞浙省海塘於本年六月初二日風潮偶作衝決甚多總因數年來經理官員將舊日工程不隨時修補以致腳根空虛隆昇與程元章等意見不合汪瀝張坦麟但知隨聲附和不顧國家之前因虐

使民夫剋減石料經朕申飭略知收斂然每石萬斤尙減價六七折不等欲符原估六萬之數責令石匠包賠以致逃亡誤工朕不惜數百萬帑金冀以保全一方民生而各官懷挾私意不知爲國爲民宜乎上天垂象以示儆也目今秋汛正大一切修搶保護事宜俱交與隆昇程元章汪隆張坦麟等悉心料理儻仍蹈前轍再有疏虞致傷田廬民命必將伊等從重治罪郝玉麟既不據實奏聞亦不能置身事外○令截畱湖南漕米十三萬石備黔省賑恤之用○廣西提督霍昇奏與總兵王無黨等率兩粵兵七千餘名陸續已到古州分兵前進八寨剿殺逆苗七次斬獲甚多見與古州總兵韓勳酌議分撥進剿○已酉改江南潁州爲府○令督撫轉飭州縣官嚴禁酒肆不得沽酒與軍營撤回之兵丁違者責懲○調派保定兵二千及熱河浙江湖廣四路回營兵各一千往常

德辰沅等處分駐彈壓命都統甘圖等統率料理以湖南緊接黔省之思南鎮遠等府也○乙卯刑部議革職署甘州提督劉世明等縱兵爲盜冒餉侵帑各案請擬斬立決從之○大學士一等伯鄂爾泰疏請罷斥並削去伯爵得旨古州苗疆一案從前鄂爾泰以爲必應征剿彼時苗民相率向化功成迅速朕心嘉悅特錫伯爵乃平定未久卽數次蠢動近則直入內地焚劫黃平一帶郡邑居民受其擾害朕詢問情由鄂爾泰亦以爲出於意外是從前經理本無定見布置未協所致則朕一時之輕率誤信亦無以自解國家錫命之恩有功則受無功則解古今通義著解大學士任削去伯爵並給假養病仍食俸○丙辰以浙江風潮爲災命朱軾往勘海塘總理工程隆昇等俱聽節制○丁巳史貽直奏鎮臣米國正倡買蒙古子女以致該將弁軍民效尤上諭米國正等因蒙

古乏食用價收買俾得存養與尋常典買蒙古人口者有間不必  
參處○查郎阿奏準噶爾使臣垂納木喀等到營於六月二十七  
日出關舍圖卡倫西去○雲南總督尹繼善奏大兵雲集分路會  
剿焚洗逆巢數十殺苗千餘生擒賊首阿九訊知大賊首汪柱等  
於空拜等寨築屯嚴飭擒剿見在清平黃平餘慶平越等處俱已  
平定○湖廣總督邁柱奏前於湖南永定九谿二衛適中之地建  
設安福縣治人民田賦附近安福者歸安福遠在各屬者撥歸各  
屬惟二衛撥歸慈利永順二縣所征屯糧疆界不清民屯差互官  
民多有未便永定衛四面環山一水四達人民聚居商賈輻輳請  
於永定衛地添設一縣以原撥永順慈利二縣所轄軍戶與慈利  
縣分出民人並見在改土歸流之茅岡司地計周圍八百餘里建  
縣治設知縣一員典史訓導各一定所設縣曰永定部議從之○

安徽巡撫趙國麟奏壽州新分鳳台縣田賦淆混等則莫辨無魚鱗底冊可稽有豪強兼併愚懦包賠之弊請履畝清查如有隱漏及避重就輕者准自報其地糧多之戶亦令勘明改正不得逾八月之限部議從之○己未南稱族番民貢馬爲郭羅克賊番劫奪例應補交馬價免之○庚申許容奏甘肅全省本年額賦蒙恩蠲免其未奉旨之先已經完納者一十二萬餘兩請照例充餉上諭朕因嘉獎秦民急公趨事是以特加格外之恩而其中爭先完課者尤爲良善之民著將已完若干准作來年正賦許容可傳旨速諭俾閭閻咸知朕意○辛酉以邁柱爲武英殿大學士兼吏部尙書查郎阿爲文華殿大學士兼兵部尙書以張廣泗爲湖廣總督查郎阿仍管陝西總督召史貽直來京劉於義仍畱肅州以欽差大臣關防給之俟軍需告竣請旨回京

八月己巳諭辦理苗疆事務王大臣等向來經理苗疆之意原因苗性兇頑久爲地方居民之害是以計議勦撫爲久安百姓之計乃經理不善以致逆苗突入內地勾引熟苗肆行搶掠良民遭其荼毒以安民之心而成害民之舉朕與經理之大臣安能辭其過耶每當讞獄之時遇身獲重罪之犯應加刑辟者朕與執法之官猶必再四推研求其生而不得然後寘之於法今黔省被害之民皆無罪之良民也我君臣目視其遭兇苗之慘禍此心更何以安其幸得保全之民人此時當竭力撫綏勿憚煩勞勿惜公帑期登災黎於衽席若再稽查不力董率無方以救災恤困之資或飽汚吏貪官之腹不令窮民得沾實惠經朕訪聞必將大小官員在該省卽時正法其災黎避往之地方亦照此旨一體料理貴州既有被害之州縣則運餉募夫俱須鄰近接濟著將今年黔省錢糧通

行蠲免其被賊殘害之州縣蠲免三年若有已徵在官者准抵下次應徵之額賦著將此旨通行曉諭各省官弁兵民等咸使聞知○哈元生奏自五月初六日以後遣發各省官兵將雞溝丹江稿貢台拱柳羅清江各處俱已開通軍聲大振見今痛加剿除其有實係被脅附從者許其悔罪投誠得旨慎無姑息以貽後患惟於張照哈元生是問○免江南泰州上元等二十州縣雍正十二年水災額賦有差○丁丑諭辦理苗疆事務王大臣等湖南沅州切近黔省聞難民聚集者竟至萬人且雇募夫役赴黔運餉者又多係沅州之民著將沅州今年額賦全行蠲免若有已徵在官者准抵明年應徵之數其雲南廣西近黔之郡縣若有似此多養難民努力趨事者著該督撫查明具奏○癸未授先賢冉耕後裔世襲五經博士○乙酉改性桂爲吏部尙書仍畱軍營以通智爲兵部

尙書○丙戌命蒙古牧養軍營牲畜每年一百匹內倒斃六匹以下者免其賠補○丁亥 上不豫仍照常辦事○戊子 上疾大漸召莊親王允祿果親王允禮大學士鄂爾泰張廷玉領侍衛內大臣豐盛額訥親內大臣戶部侍郎海望至寢宮前大學士鄂爾泰張廷玉恭捧 上御筆親書密旨命 皇四子寶親王爲皇太子卽皇帝位少頃 皇太子傳 旨著莊親王允祿果親王允禮大學士鄂爾泰張廷玉輔政○己丑子刻 上崩遺詔曰自古帝王統御天下必以敬 天法 祖爲首務而敬 天法 祖皆本於至誠至誠之心不容一息有間是以宵旰焦勞無日不兢兢業業也朕蒙 皇考聖祖仁皇帝爲 宗社臣民計慎擇於諸子中命朕續承統緒紹登大寶夙夜憂勤深恐不克負荷惟仰體 聖祖之心以爲心仰法 聖祖之政以爲政十三年以來竭慮殫心



朝乾夕惕雖至勞至苦不敢以一息自怠方冀圖安保泰久道化成今朕躬不豫奄棄臣民志願未竟不無微憾竇親王皇四子秉性仁慈居心孝友 聖祖皇考於諸孫之中最爲鍾愛撫養宮中恩逾常格雍正元年八月朕於乾清宮召諸王滿漢大臣入見面諭以建儲一事親書諭旨加以密封收藏於乾清宮最高之處卽立爲皇太子之旨也其後仍封親王者蓋令備位藩封諳習政事以增廣識見今旣遭大事著繼朕登基卽皇帝位仰賴 上天垂佑 烈祖貽謀當茲寰宇乂安太平無事必能與億兆臣民共享安甯之福至於國家刑法禁令之設所以詰奸除暴懲貪黜邪以端風俗以肅官方者也然寬嚴之用又必因乎其時從前朕見人情澆薄官吏營私相習成風罔知省改勢不得不懲治整理以戒將來今人心共知儆惕矣凡各衙門條例有從前本嚴而朕改易

從寬者此乃從前部臣定議未協朕與廷臣悉心斟酌而後更定以垂永久應照更定之例行若從前之例本寬而朕改易從嚴者此乃整飭人心風俗之計原欲暫行於一時俟諸弊革除之後仍可酌復舊章此朕本意也向後遇此等事則再加斟酌若有應照舊例者仍照舊例行自今以後實願內外親賢股肱大臣念朕朝乾夕惕之苦衷仰答 皇考聖祖仁皇帝利益 社稷蒼生之誠念各秉忠良屏除恩怨一心一德仍如朕在位之時共相輔弼俾皇太子成一代之令主則朕付託得人追隨 列祖 皇考在天之靈亦可不愧不忤矣皇太子仰承 祖宗積累之厚受朕訓誨之深與和親王弘晄同氣至親實爲一體尤當誠心友愛休戚相關親正人行正事聞正言勿爲小人所誘勿爲邪說所惑 祖宗所遺之宗室宜親國家所用之賢良宜保自然和氣致祥綿 祖

宗社稷萬年之慶矣莊親王心地醇良和平謹慎果親王至性忠直才識俱優皆可倚以辦理政務者大學士張廷玉器量純全抒誠供職鄂爾泰志秉忠貞才優經濟此二人者朕可保其始終不渝將來二臣著配享太廟以昭恩禮其應行儀制悉遵成典持服二十七日釋服布告天下咸使聞知○是歲十一月丁未恭上尊諡曰敬天昌運建中表正文武英明寬仁信毅大孝至誠憲皇帝廟號世宗○乾隆二年三月庚寅葬泰陵○嘉慶四年五月戊辰加上尊諡曰敬天昌運建中表正文武英明寬仁信毅睿聖大孝至誠憲皇帝上在位十三年聖壽五十有八上睿哲性成寬仁內蘊天姿英毅神采奕然奉事聖祖仁皇帝曲盡孝思蒙睿最深視躬秉禮誠一不移尤能調護宮廷烝烝友愛而大公至正無黨無偏當其恪守藩維睿襟凝

邈固已穆然深遠矣 聖祖宸衷默鑒神器攸歸繼統以來以善  
繼善述之心昭丕顯丕承之烈紹聞衣德建極綏猷蓋十三年如  
一日焉 郊壇禋祀必親必虔清明在躬昭事上帝誠之至也素  
服三年永懷孺慕愾聞僉見默契羹牆孝之至也其勤於政事也  
朝乾夕惕旰食宵衣盛暑祁寒勵精罔間凡臣僚章奏目覽手披  
不稽晷刻竭百千臣工以一人治一事而不足者 上一心獨覽  
坐照靡遺健之至明之至也其慎於用材也位事惟能知人則哲  
凡臣僚得失皆在 睿照之中公忠交著者寄以股肱才守兼優  
者加之倚任杜朋黨比周之習懲沽名袒護之私賞不逾時罰無  
枉抑優給養廉贍私家之用倍增恩俸紓內顧之艱義之盡仁之  
至也 文德則 經筵歲舉釋菜 親臨崇五代之榮封廣兩闡  
之解額兼文行以重館選簡考官以慎文衡公車者置邸舍於郊

垌下第者給歸貲於內帑立宗人之學開繙譯之科八旗子弟教  
有專師六館生徒恥言奔競此士風所以丕振也 武功則 天  
威遠播 廟算如神青海定而萬里獻俘西藏安而遐方嚮化允  
安南之請地示以懷柔減朝鮮之貢糧綏之德意又復貯公項以  
恤戎行之緩急出帑金以濟八旗之吉凶從征之士許以更番退  
老弁員予之半俸此戎政所以聿修也至於心周海宇念切烝黎  
減賦捐租設倉貯穀莫不與時消息計畫萬全耕藉以勸農功營  
田以足畿輔倉儲充溢水利畢興又復宜民善俗興孝崇廉隆廟  
祀以旌烈褒忠酌議敘以睦姻任卹所謂先之勞之富之教之法  
良而意美也若夫刊律例以昭示愚氓重桁楊以式敬庶獄爰書  
待決奏覆必至再三定讞不移哀矜見諸辭色憫囹圄之苦則淹  
繫恆寬念瘴癘之鄉則遷流可改所謂好生之德洽於民心也昔

程子之論治道曰天下之大非體乾剛健不能治也或欲爲而不知所措或始銳而不克其終或安於積久之弊而不能改爲或惑於眾多之口而莫之適用朱子亦曰古人察理精密持身整肅其意以愛人爲本及其施之於政事便須紀綱禁約截然而不可犯然後吾之寬愛得以隨事及人而無頽敝不舉之處也 上臨御十有三年一本乎乾德之剛天行之健兢兢業業慎始敬終故不泥於成憲不愆於舊章羣言有所不能淆庶務有所不能困程子所稱剛健朱子所云寬愛 上以一心運之而變而通之以盡利鼓之舞之以盡神嗚呼盛矣珠聯璧合之瑞靈芝甘露之祥符貺炳燦歲不絕書而 聖懷謙約有而不居嗚呼此所以紹 列聖之詒謀而益裕萬年之景福也歟